



*Šemsudin Mehmedović*

Broj: 01-143/23

Sarajevo: 11.12.2023.godine

PREDSTAVNIČKI DOM  
PARLAMENTARNE SKUPŠTINE  
BOSNE I HERCEGOVINE  
n/r predsjedavajućeg

БОСНА И ХЕРЦЕГОВИНА  
ПАРЛАМЕНТАРНА СКУПШТИНА БОСНЕ И ХЕРЦЕГОВИНЕ  
SARAJEVO

PRIMLJENO: 11-12-2023			
Organizaciona jedinica	Klasifikaciona oznaka	Redni broj	Broj priloga
01-	50-1	2558	23

**PREDMET:** Zastupnička inicijativa kojom se obavezuje pet institucija Bosne i Hercegovine sa sjedištem u Republici Srpskoj da osiguraju odgovarajuću nacionalnu zastupljenost državnih službenika u skladu sa Zakonom o upravi i Zakonom o državnoj službi

U skladu s članom 8. Poslovnika Predstavničkog doma Parlamentarne skupštine Bosne i Hercegovine („Službeni glasnik BiH“, br. 79/14, 81/15, 97/15, 78/19 i 53/22) upućujem zastupničku inicijativu Predstavničkom domu Parlamentarne skupštine Bosne i Hercegovine,

Predstavnički dom Parlamentarne skupštine Bosne i Hercegovine obavezuje institucije Bosne i Hercegovine, i to: Upravu za indirektno oporezivanje Bosne i Hercegovine, Direkciju za civilno zrakoplovstvo Bosne i Hercegovine, Agenciju za forenzička ispitivanja i vještačenja Bosne i Hercegovine, Agenciju za nadzor nad tržištem Bosne i Hercegovine i Institut za standardizaciju Bosne i Hercegovine, da u skladu s članom 7. Zakona o upravi i članom 2. Zakona o državnoj službi u institucijama Bosne i Hercegovine osiguraju odgovarajuću nacionalnu zastupljenost zaposlenih u skladu s nacionalnom strukturom stanovništva, prema posljednjem Popisu stanovništva u Bosni i Hercegovini iz 2013. godine.

U skladu s članom 171. st. (2) Poslovnika Predstavničkog doma odgovor u pisanoj formi mora biti dostavljen u roku od 30 dana.

### Образложење

Na 6. sjednici Predstavničkog doma Parlamentarne skupštine Bosne i Hercegovine, održanoj 19.4.2023. godine, predstavio sam analizu odgovora 72 institucije Bosne i Hercegovine koja se odnosila na moje zastupničko pitanje o brojčanoj i procentualnoj nacionalnoj zastupljenosti državnih/policijskih službenika i zaposlenika Bošnjaka, Srba, Hrvata i Ostalih u institucijama Bosne i Hercegovine.

Tada sam ukazao na činjenicu da rukovodioci institucija ne poštuju član 7. Zakona o upravi („Službeni glasnik BiH“, br. 37/03, 102/09 i 72/17), kojim je propisano da su obavezni osigurati odgovarajuću nacionalnu zastupljenost državnih/policijskih službenika i zaposlenika u skladu s nacionalnom strukturom stanovništva, a prema posljednjem popisu stanovništva u

Bosni i Hercegovini iz 2013. godine niti član 2. st. 1. Zakon o državnoj službi u institucijama Bosne i Hercegovine („Službeni glasnik BiH“, br. 19/02,35/03,4/04, 17/04, 26/04, 37/04, 48/05, 2/06, 32/07,43/09,8/10, 40/12 i 93/17) kojim je precizirano da „struktura državnih službenika u državnoj službi okvirno odražava nacionalnu strukturu stanovništva Bosne i Hercegovine prema posljednjem popisu stanovništva“.

**Analizom je utvrđeno da je u čak 59 od 72 institucije očigledan debalans zaposlenih na štetu Bošnjaka i Ostalih. U periodu od aprila do decembra 2023. godine sa prijemom novouposlenih državnih službenika povećan je debalans na štetu Bošnjaka i Ostalih, što dokazuju sljedeći statistički podaci za pet institucije sa sjedištem u Republici Srpskoj (odgovor Uprave za indirektno oporezivanja na zastupničko pitanje od 23.11.2023. godine i podaci sa veb stranice Agencije za državnu službu Bosne i Hercegovine na dan 5.12.2023.):**

1. Uprava za indirektno oporezivanje Bosne i Hercegovine – svi zaposleni  
Bošnjaci 877 (40,6%), Srbi 813 (37,6%), Hrvati 464 (21,5%) i Ostali 8 (0,4%);

**Bošnjaka je manje za 206 pozicija od broja koji je zakonom utvrđen, Srba je više za 147 pozicija, Hrvata je više za 130 pozicija i Ostalih je manje za 71 poziciju. Na rukovodećoj poziciji šefa odsjeka Srba je 27 (58,7%), Hrvata je 8 (17,4%), Bošnjaka je svega 11 (23,9%) i Ostalih je 0.**

2. Direkcija za civilno zrakoplovstvo Bosne i Hercegovine – državni službenici  
Bošnjaci 5 (14,7%), Srbi 27 (79,4%), Hrvati 2 (5,9%), Ostali 0;
3. Agencija za forenzička ispitivanja i vještačenja Bosne i Hercegovine -drž. službenici  
Bošnjaci 4 (23,5%), Srbi 9 (52,9%), Hrvati 3 (17,6%) i Ostali 1 (5,9%);
4. Agencija za nadzor nad tržištem Bosne i Hercegovine – državni službenici  
Bošnjaci 4 (26,7%), Srbi 8 (53,3%), Hrvati 3 (20%) i Ostali 0.
5. Institut za standardizaciju Bosne i Hercegovine – državni službenici  
Bošnjaci 5 (18,5%), Srbi 16 (59,3%), Hrvati 4 (14,8%) i Ostali 2 (7,4%).

U Direkciji za civilno zrakoplovstvo Bosne i Hercegovine, Agenciji za forenzička ispitivanja i vještačenja Bosne i Hercegovine, Agenciji za nadzor nad tržištem Bosne i Hercegovine i Institutu za standardizaciju Bosne i Hercegovine ukupna nacionalna struktura državnih službenika je sljedeća:

**Bošnjaci 18 (19,4%), Srbi 60 (64,5%), Hrvati 12 (12,9%) i Ostali 3 (3,2%).**

Prema popisu stanovništva iz 2013. godine, u Bosni i Hercegovini ima 15,43% Hrvata, 30,78% Srba, 50,11% Bošnjaka i 3,68% Ostalih.

**Činjenica je da u gore navedene četiri institucije državnih službenika Bošnjaka ima svega 19,4 %, a Srba je 64.5%, što je za 109.6% više od zakonom utvrđenog broja.**

Ovi statistički podaci o broju državnih službenika nisu slučajni, nego su rezultat dugogodišnjeg zajedničkog djelovanja rukovodilaca institucija koji su članovi HDZ-a i SNSD-a.

Iz ovog proizilazi da u Bosni i Hercegovini nema dovoljno stručnih Bošnjaka i Ostalih za obavljanje „zahtjevnih“ poslova u državnoj službi, nego da te visoke kriterije uglavnom zadovoljavaju Hrvati i Srbi, što nije tačno. Da ironija bude veća, zastupnici i delegati iz Republike Srpske u pismu američkom Kongresu i Senatu ističu „navedene nacionalitičke politike najvećih bošnjačkih stranaka, kao i stalna nastojanja da ostvare prevagu u institucijama vlasti u Bosni i Hercegovini, potvrđuje njihovu namjeru da vladaju Bosnom i Hercegovinom bez Srba i Hrvata“.

Navedeni podaci o nacionalnoj strukturi državnih službenika u institucijama Bosne i Hercegovine jednostavno demantuju ovakve neistine, kao i konstantne navode o tobožnjoj unitarizaciji i majorizaciji od strane Bošnjaka.

Krajnje je vrijeme da se zaustavi zapošljavanje na štetu Bošnjaka i Ostalih, jer je očigledna namjera HDZ-a i SNSD-a da, suprotno Ustavu i zakonima Bosne i Hercegovine, Bošnjaka i Ostalih ima što manje zaposlenih u institucijama Bosne i Hercegovine, a naročito na rukovodećim pozicijama.

S poštovanjem,

ZASTUPNIK PS BiH  
Šemsudin Mehmedović

